



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

**NEP-i Tamil Nadu indang education
raksatsütsü: MK Stalin**

**Deepti all-rounders rankings
nung top 5-i iogo**



VOL. XXII ISSUE NO. 147 (ADOK 147) DIMAPUR RASEMNÜ (WEDNESDAY) METSÜREMI (MARCH) 12, 2025 ₹ 5.00

Mauritius-i PM Modi nem tematiba naroküm agütsür

New Delhi, March 11, 2025

(Agencies): Mauritius Prime Minister Dr Navinchandra Ramgoolam-i Prime Minister Narendra Modi nem par linük nung highest award agütsütsü metetdaksüogo.

Iba sempet ya "The Grand Commander of the Order of the Star and Key of the Indian Ocean" lir aser India nunger rongnung mezüng atema iba sempet angurji PM Modi lir.

"Onok Republic akümba sülen bendanger pungu nem dang iba naroküm agütsüogo aser parnok rongnung Gandhi of Africa, Nelson Mandela dena lir" ta Mauritius PM-i ashi.

Mauritius Prime Minister Ramgoolam-i jaokba agi PM Modi-i par linük semdangi oa lir. Mongulbarnü PM Modi-i Mauritian prime minister aser pa kinungsü Veena Ramgoolam na nem Overseas Citizen of India

(OCI) cards agütsü.

PM Modi-i Mauritius National Day nung tongti tesemdanger ama shilem agi aser pai o jembidang India aser Mauritius tsünga tesentaktep tajung aliba indang jemb.

PM Modi-isa State House nung Ayurveda garden semdang. Iba ya India sorkar den yaritepa yangluba lir aser Modi-i Mauritius President Dharambeer Gokhool den külemi garden semdanga liasü.

PM Modi-i OCI cards agütsü aser iba sentong nung Mauritius cabinet züngsemted dena nisung 3,500 tema aden.

March 2024 nung India-i India nungi jakzüka Mauritius sensotem asoshi OCI card eligibility agütsütsü telemtetba agia liasü.

Mauritius nung India senso 22,188 aser OCI card holders 13,198 lir.

Assam nung CAA kübok nisung 2 nem senso agütsü

Guwahati, March 11, 2025

(Agencies): Assam nung Citizenship (Amendment) Act (CAA) kübok nisung ana nem India senso agütsüogo ta Parliamentary Affairs Minister Chandra Mohan Patowary-i ashi.

State Assembly nung Patowary-i Chief Minister Himanta Biswa Sarma tenüng nung jembidang iba osang lemsat.

Ashishitep aketba CAA ya 2019 nung yanglu aser 2024 nungi mapa küma tenzüik. Iba Act ajanga Afghanistan, Bangladesh, aser Pakistan nungi December 31, 2014 matongdang non-Muslim nunger India-i arurtem nem senso agütsür.

Assam nung CAA kübok applications 39 aru ta Directorate of Census Operations-i ashi.

Parnok rongnungi nisung 2 nem senso agütsüogo aser applications 18 reprangdar ta Directorate-isa ashi.

Tanünga applications 19 ji shibangogo ajisüaka parnoki ano tanaben citizenship atema tenüng agütsütsü akok.

Karimganj North nungi Kamalakhya Dey Purkayastha-i asüngdangba ka langzüdang Minister Patowary-i iba osang agütsü.

2021 aser 2024 tsünga Bangladeshi nunger 156 tashi ozüng alema Assam-i aruba apu ta Chief Minister Sarma-i metetdakja liasü.

2021 nung nisung 51 apu, 2022 nung 57, 2023 nung 22 aser Bangladesh nung tensa mejungi akümba agi 2024 nung 26 apu.

Saudi Arabia nung Ukraine-US senden amener

Jeddah, March 11, 2025

(Agencies): Russian air defences-i Ukraine nunger drones 337 khazüka yokba sülen ghonda ishika lir Saudi Arabia nung Ukraine aser United States tsünga olemtep tenzüikogo.

Russian regions 10 nung Ukraine-i drone amshia amakdang nisung 2 tepset aser 8 yirua liasü ta ketdangsürtemi ashi.

Saudi Arabia kübok Jeddah nung Ukraine nunger teshimtet telok kati US Secretary of State Marco Rubio den olemteptsü atema ajurute.

Parnok senden amenba takdang nung American, Saudi aser Ukrainian flags yua liasü aser Saudi Arabia nung foreign minister senden nung aden.

February 28 nü Ukraine

President Volodymyr Zelenskyy-i White House semdangdang Trump'er sorkar den tesentaktep mejungi aküm anungji tang Jeddah nung olemtep ajanga tesentaktep akangshitsü maongka angur.

Ukraine ketdangsürtemi Hombarnü osangbener den jembidang parnoki Black Sea tashi ceasefire alitsü shidangtsü ta ashi.

United States-i Ukraine nung earth minerals agitetsü atema agreement nung sign asütsü mulunga lir ta Ukraine ketdangsürtemi ashi. US President Donald Trump-i iba tenangzüktep kanga aginür.

"US-i küm asem rara anentsü atema onük kecha balaka melemsateptsü saka Ukraine-i kechi ashir angadangtsü" ta Secretary of State Rubio-i ashi.

Pakistan train amakdang sepai 30 tepset; 214 pua lir



New Delhi, March 11, 2025

(Agencies): Pakistan kübok Balochistan province nung telungpurtemi Mongulbarnü Peshawar-i aoba train ka amak aser passengers 450 jungnüa pur ao.

Baloch Liberation Army (BLA)-i train amakba sülen mapang tatsüka lir civilian hostages chiok aser nisung 214 parnok ket nung yua lir.

Baloch Liberation Army (BLA)-i sangdong ka agütsüba nung parnoki train amak aser nisungtem pur aoba atema tenüng agiba shia lir.

Parnoki iba train nungi security forces dena nisungtem pua lir aser train amakdang sepia 350 tema tepsetogo ta BLA-isa metetdaksü.

"BLA-i kanga dang sentong

tajung atonga Mashkaf, Dhadar, Bolan nung operation ka agiogo. Ozü nüjiso atema rarartemi railway track poksatsü aser Jaffar Express anendaksü. Ozü rarartemi train amak aser passenger ajak apu" ta parnokisa metetdaksü.

Mongulbarnü train amakdang train driver ka yiru ta police aser railway ketdangsürtemi ashi. Train ya Quetta nungi Peshawar-i aodang lendong ajuru aser rescue teams o security forces tesem tonga ogo.

Ajisüaka, BLA-ibo Pakistani Army den raradang sepia 100 apuba indang osang metetdaksüogo.

BLA-isa tayimtsü ajanga amakba manenra parnoki pua alir ajak tepsettsü metetdaksü.

Balochistan sorkari emergency measures benokogo aser reju ajaki tensa azüoktsü atema mapa tenzüikogo ta government spokesperson Shahid Rind-i ashi.

Balochistan nung telungpurtemi tesüiba küm ter tashi Pakistani sorkar, army aser Chinese company tem dak tenük yoka amaker.

Pakistani sorkar den küm aika rarayonga aruba telungpur teloktem rongnung BLA ya ka lir. Pakistan sorkari Balochistan nung gas aser mineral resources tim mesüi agir ta parnoki tai tongloktsür.

Pakistan nung Balochistan province ya tulutiba lir aser linük ali 44% jungnüa iba province kübok lir.

Churachandpur nung Kuki-Zo lennirtem aser MHA tsünga olemteper

Imphal, March 11, 2025

(Agencies): Kuki-Zo lennirtem aser Kangpokpi district administration tsünga olemtep takok menguteti tembangba sülen ano March 11, 2025 nungi olemtep tasen tenzüikshio.

Senden ya nikongdang 6:00 ako nungi tenzüik Lamka, Churachandpur nung Deputy Commissioner office nung tenzüik aser Ministry of Home Affairs (MHA) nungia teshimtet nübo ka aden.

Iba olemtep ya MHA Advisor for the Northeast aser Kuki Suspension of Operations (SoO) groups atema interlocutor AK Mishra-i anir agir.

Kuki-Zo Council, Committee on Tribal Unity, Indigenous Tribal Leaders' Forum, Kuki Inpi Churachandpur, ITAC, aser Zomi Council dena Kuki-Zo teloktemi olemtep nung adener.

Külen, Kuki-Zo nunger aliba tesemtem nung tanü agi anogo asembuba mokdangogo.

March 8 nü Kangpokpi district kübok Keithelmanbi Military Colony nung lanur ka tepsetba anema nübortemi lungkak aittsü tenzüik. Iba tatalokba sülen tasü mangji Kangpokpi District Hospital Morgue nung yua lir aser Kuki-Zo tetsürtemi mangyimba sentongtem ayonga agir.

Kuki-Zo tsürtemi Kangpokpi nung gari senzüba noktanger aser parnok emergency services indang garitem dang senzüdaksür.

Iba mokdang ajanga shishilembabaren mali kümogo aser Senapati district nung khu abenba truck garitem anendena lir.

Senapati district kübok Hengbung aser T Khullen yimtsüngtem tsünga National Highway 102 nung gari 500 shi anendena lir.

Iba highway ajanga Myanmar nungi Imphal, Kohima, aser Dimapur ajanga India

sendakteper.

"Police-i gari anendena aliba aser nisungtem kümzüka ayutsü atema mapa inyaker. Ajisüaka ozüng alema inyakeritemi khu abenba garitem amaksü akok. Police aser local civil society organizations-i passengers, drivers, aser assistants nem tzü aser nüngdakattem agütsür" ta Senapati Superintendent of Police Dhramendra Tyagi-i ashi.

Senapati District Students Association president Salony Tony-i Kuki-Zo Council, Indigenous Tribal Leaders' Forum (ITLF), aser Kuki Students' Organisation (KSO) dang March 8 nungi tenzüikba mokdang anentsü ayongzüikogo.

Iba mokdang ya Naga nunger dena tangar aika timtemer, ta Tony-i ashi. Külen non-Manipuri drivers-i sorkar dang yaritsü mepishiogo. Parnok garitem nung piyaz, alo aser ango amala raksaba chiyungtsütem bena lir ta parnoki ashir.

Kohima DC Kumar Ramnikant den tepila sentong agi



Kohima Deputy Commissioner menden yutsür Kumar Ramnikant, IAS ajanga March 11, 2025 nü Deputy Commissioner tasenba, B. Henok Buchem, NCS nem mapa amoktsü dang tangokba noksa nung angur.

Dimapur, Metsüremi/March 11 (TYO): Kohima indang Deputy Commissioner menden yutsüsang Kumar Ramnikant, IAS nem akhum agüja tepila sentong ka DPDB Hall, Kohima nung March 11, 2025 nü agia liasü, kong district heads of offices tem dena liasü.

Sentong nung Kumar Ramnikant-i tepila o jembidang, küm pongu tashi district balala nung Deputy Commissioner inyaktsü maongka agütsüba atema pelaba lemsatepa liasü.

Kohima nung DC inyakdang 2024 küm Lok Sabha Elections, Urban Local Body Elections, Hornbill Festival aser 16th Finance

Commission-i semdangba indang bilemteta jembia aser tayongzükba aser tangazükba agi sünger liasü ta ashi.

Pai ketdangsürtem dang pei temulung nung anisüngzük aser tesunep angutsüsa mapa inyaktsü ayongzük.

Kumar Ramnikant-i pa indang office nung ketdangsür nem tenüngsang agütsü aser Chief Minister, MLAs, Angami Public Organization (APO), Angami Women Organization (AWO), Angami Youth Organization (AYO), Kohima Village Council aser lokti tentet balalai yaritepba asoshi pelaba lemsatepa liasü.

Ramnikant-i pa transfer aoba

ya tatem salem ashir masü saka shilem melenshir dang lir, ta ashi.

Heads of Offices tenüng nung T. Lanusenla Longkumer, NCS, CEO, Kohima Municipal Council ajanga jembidang Kumar Ramnikant dak shisatsü aser lenir sempet aliba indang tushia liasü.

Sentong nung Abeinuo Jasmine Ashao, NCS, SDO (Civil) HQ Kohima menden liasü aser Ülikhrie Folk Group ajanga temeja ken ka aten, Emilo Patton, DEO Kohima ajanga sentong tenzüka sarasadem aser Zajamo Odyuo, Associate Pastor, City Church, Kohima ajanga temoatsü meshia sarasademja liasü.

Longleng nung International Women's Day amung



Longleng nung March 8, 2025 nü International Women's Day amungdang tangokba noksa ka yangi angur.

Dimapur, Metsüremi/March 11 (TYO): Phom Baptist Christian Association (PBCA) Women department ajanga Phomla Hoichem Longleng den lungjemer March 8, 2025 nü "Accelerate Action" omen nung ajemdaker PBCA Convention Hall, Longleng nung International Women's Day munga liasü.

Iba sentong nung ENWO tir Yingphe Konyak sentong akhumdong aser EAC Longleng, Imkongnukla Ao tetushi tesemdang ama dena liasü.

Iba sentong nung Longleng District kübok arogo ajak aser Women Union 20 aser apex hoichem nungi züngsemtem dena liasü.

Women Secretary, PBCA, P. Angbhenla Phom-i iba anogomung omen rateta ashi aser 'gender justice' alitsü mechi alima nung tetsürtem telemtetba agiba, zülubanglu, ozüng yangludak aser social action nung dendaktsüsüla, ta ashi.

Tetsür temeden koba ajanga

tetsür nem tashi agütsür aser mapa balala inyaktsüsüba tashi lir, itemji nembanga mayutsüla. La indang sempet, tashi, qualifications aser tekolok shisatsü ajanga alima tajungba kumdaktsüsüla, ta Angbhenla Phom-i ashi.

EAC Longleng, Imkongnukla Ao-i iba sentong nung jembidang, arogo, yimtenren aser administration tsütsü tetsür temi mapa tajung inyaker, ta ashi.

India nung tetsürtem asoshi Nagaland ya tetsübotsü makettüba tesem lir. Tetsür temi teti bendanga agütsür inyaker saka laji tashi mait masü, ta Imkongnukla-i ashi.

Lai ajakji temulung uluba aser tashi aitiba ajanga inyaktteter. Puti otsü nung takok anguba tetsür temi teti meranga inyak aser parnoka tayongzükba balala liasü. Tebur temia tetsür nem tashi agüja alitsü angazüktsüla. Tetsürtem asoshi financial literacy aser digital literacy ya kanga tongtipang lir, kechiaser

ibai self-empowerment amai lir, ta lai ashi.

ENWO tir Yingphe Konyak-i sentong takok ngua ayongzükba atema Tsüngrem nem tenüngsang agütsü aser PBCA Women Department aser Phomla Hoicjem dang pelaba lemsatepa liasü.

Iba sentong indang omen ajanga tetsür atema tejakleni renloka aoba ya soita mayutsüla ta ashi.

Lai lokti dang kati ka yariteptsü aser tesendaktep akangshitsü ayongzükba liasü.

Lenirtem aser stakeholders temi telemtetba agiba nung ajak inoksemtsüla aser telok ka mesüra tetsür-tebur telemsa madokdaktsüsüla, ta ashi.

Meteta aser mememeti ateplong nung tebur atema bilema jembiba ajanga lokti meshidak adokdaktsür, aser tetsür soita ayuba lokti laotsü, ta Yingphe Konyak-i ashi aser tetsürtem dang pei temeden asoshi tasü ita nokdaktsü ayongzük.

Nagaland nung political party ajunga den senden amentsü

Dimapur, Metsüremi/March 11 (TYO): Nagaland nung aliba political party ajunga den senden ka March 13, 2025 anüngdang 12:00 ako nungi tenzüka Civil Secretariat nung aliba Home Commissioner, Nagaland indang Conference

Hall nung amentsü, ta Chief Electoral Officer, Nagaland, Vyasan R, IAS ajanga sangdong ka nung metetdaktsü.

Iba senden nung Political Party ajunga nungi nübu shima dendaktsüsü ayongzük, ta sangdong ajangasa ashi.

Patkai Christian College nung workshop ayongzük



Dimapur, Metsüremi/March 11 (TYO): Nagaland nung sentong balala ayongzükba ketdangsüba mangdang ulushitsü nükjidong nung Patkai Christian College nung Department of Mass Communication ajanga Mongulbarnü 'Event Management: Conceptualization to Execution' omen nung ajemdaker workshop ka ayongzükba liasü.

Sentong ya Kaki Marketing nung Social Media Coordinator, Khakhuli Chishi-i agia liasü, shiba Mass Communication Department nung zünga liasü.

Workshop mapang Chishi-i sentong ketdangsüba nung ajangshiba aser shisa lemsatepa sentong ayongzükba nung tayongzükba aser sempet

indang lemsatep.

"Tatem nung sentong ayongzük dang timtemaka tajangzük lir," ta lai Kaki Marketing nung inyakdang ajangshiba athishia ashi. Kaki Marketing ya tang Nagaland Super League indang marketing aser media partner lir.

Lai kaketshirtem dang sentong balala tajungba kuma ajungkettsü asoshi tasa lemsatepdang, poster design, layout planning aser video promotions ajanga clients atsür arur aser sentong takok ngua ayongzüktteter ta ashi.

Social media marketer ka ama Chishi-i Nagaland Super League aser Hornbill Festival nung shilem agiba indanga lemsatepa liasü.

Kohima DPDB senden nung terenlok maparen lepa repringtep

Dimapur, Metsüremi/March 11 (TYO): Ita shia amenba Kohima District Planning & Development Board (DPDB) senden March ita atema DPDB Hall, Kohima nung March 11, 2025 nü Vice-Chairman DPDB aser Deputy Commissioner, Kohima, Kumar Ramnikant, IAS mendenpuba sür mena liasü.

Iba senden nung DC Ramnikant-i taoba senden nung lemtetba lepa repringshi aser boarz züngsem tasen, District Soil Conservation Officer Kohima, Renthunglo Tungoe pela agizükba liasü.

Senden nung Board ajanga Ex-Servicemen League Nagaland, Midland Kohima agizük society registration atema temaba ketdangsür dangi yoktsü lemtet.

General Manager, DIC Kohima, Ahunle Tep-i Kohima District nung Industries and Commerce Department indang PowerPoint presentation agütsü.

Iba mapang lai DIC Kohima kübok general administrative setup aser scheme balala inyakba indang lemsatepa liasü. Lai ashiba agi Prime

Minister's Employment Generation Programme (PMEGP) ya credit-linked subsidy scheme ka lir, koba micro-enterprises amenoka self-employment ajungkettsü atema Government of India-i tenzü. Iba atema online application ya www.kviconline.gov.in nung agütsütettsü, ta lai ashi.

Lai PM Formalization of Micro Food Processing Enterprises (PMFME) scheme indang rateta ashi, koba micro food processing enterprises tali toktepdaktsüsü nükjidong nung tenzü ta ashi.

Iba scheme kübok Kohima nung pickle production maparen inyaker.

Laisa Chief Minister's Micro Finance Initiative, Pradhan Mantri Vishwakarma Kaushal Samman (PM VIKAS) Scheme, Udyam Registration, Uttar Poorva Transformative Industrialization Scheme densema danga scheme balala indang lemsatepa liasü.

Taruba Kohima DPDB senden nung Power Department dang PowerPoint presentation agütsüsü nunglokja senden tembang.



New Delhi nung tetsürtem nem itashia sen 2,500 agütsütsü nangzükba dak sendakba nung Delhi Assembly nung LoP aser AAP lenir Atishi-i osangbenertem den sensaksemba noksa nung angur.

Maoists nem prangbong injang agütsüba atema nisung ka aitsüogo

New Delhi, Metsüremi/ March 11 (Agncies): Ranchi nung special court kati prangbong injang shibelener ka küm 15 tepuokdak ayutsü atema obendang agütsüogo. Iba nisung ya tang tebushidak lir aser pai Jarkhand nung CPI nem prangbong injang agütsüba atema aitsüogo, ta ketdangsürtemi Mongolbarnü metetdaksü.

NIA special court-i, Aurangabad, Bihar nungi Mantu Sharma anema iba tetuyuba agütsüogo, shiba iba ken o nung aibelena aliba ngutetogo.

"NIA-i bushisüngdangba sülen Mantu Sharma ya ozüng alema CPI züngsemtem dang prangbong injang ayokba ngutetogo. Pa aputsü atema NIA-i maneni inyakdar," ta iba agency yagi metetdaksü.

Jharkhand Police-i 2012 küm

arem nung CPI pur tesepe ka maktokba sülen ita pezü lir NIA-i iba ken o bushisüngdang agizüka liasü.

"Police-i CPI telok nung arms and ammunition supply unit nungi Prafulla Kumar Malakar pua liasü. USA nung yangluba M-16 rifle ka, injang 14, cellphone ana bullet proof jacket ka pa ket nungi nguteta liasü," ta NIA otongdari ashi.

Malakar dang ken o ashishiba sülen iba telok inyakyim jangja aküm aser ano aija alir Anil Kumar Yadav pua liasü.

Yadav ket nung 9mm pistol ka aser injang ana den sen lakh 9 aser cellphones ana nguteta liasü.

NIA-i ashiba agi, Mantu ya Yadav aser Malakar na den kanga junga sendaktepa liasü.

"CPI indang zonal

commander Yadav ya Malakar ket nungi prangbong injang alizüksü atema oya aliba mapang apu," ta otongdar yagi ashi.

NIA-i 2014 nungi 2017 küm tsüngda Malakar, Yadav aser Mantu nung anema ken o benoka liasü.

Malakar aser Yadav na aija küm 15 tepuokdak ayutsü obendang agütsüogo, ta NIA Special Court kati 2024 küm December ita shiogo.

"Special court yagi Hombarnü Mantu anema RI aser senchi ishika sangdongogo, shiba tang tashi monguteti lir. Pa ya Sections 121A, 120B, 414 of IPC, sections 25/35 & 26 of Arms Act, Sections 18 & 20 of UA Act, aser Section 17 C.L.A Act kübok küm asem nungi 15 tashi merenshitsü," ta NIA-i ashi.

MP nung Congress MLA temi sorkar anema longka ait

New Delhi, Metsüremi/ March 11 (Agencies): Congress MLA temi Mongolbarnü plastic agi yangluba per bener Madhya Pradesh assembly complex nung longkak aita liasü. BJP-i aniba state sorkari sorkar mapa tazüngtem nung per ama amener ta shia parnoki sorkar aija liasü.

Opposition lenir Umang Singhar lenisüba nung Congress MLA tem Mahatma Gandhi indang kerak yanglu

jakadang molok nung plastic agi yangluba per bener adenshi aser state sorkari state nung aliba lanurtem nem mapa magütsüba atema parnok aija yimyim balala ayima liasü.

Singhar-i ashiba agi, lanurtem mapa atema tongshi ka nungi kati kanga mazüngi asemzür, ajisüaka sorkari police, education, irrigation aser health department tem nung recruitment agiba anenogo.

"BJP sorkari state nung

mapa mongui aliba lanurtem dak per ama mechidar. Iba sorkar yagi per ama mapa tazüngtem nung mena lir. Anungji onoki unemployment dak sendakba nung sorkar saksalema kümdaksütsü atema iba longkak aitba sentong ya ayongzüka agir," ta pai ashi.

Congress lenir-i ashiba agi, education department kija nunga mapa tazüng 70,000 dak tema lir, saka sorkari iba atema temulung magütsür.



BJP MP Bansuri Swaraj-i achaayanga Delhi minister Parvesh Verma, New Delhi Municipal Council atema tenangzüktepa agiba noksa nung angur. NDMC Vice Chairperson Kuljeet Chahal-a noksa nung angur.

O M Books

Annual Clearance Sale

Time: 9:30 am to 5:30 pm
Venue: O M Books Dimapur
BIBLE / BOOKS / GIFT

DATE

13 to 22 March 2025

NEP-i Tamil Nadu indang education raksatsütsü: MK Stalin

New Delhi, Metsüremi/ March 11 (Agencies): Tamil Nadu chief minister MK Stalin-i Mongolbarnü, DMK sorkari National Education Policy (NEP) anemba nenshia metetdaksüba den union education minister Dharmendra Pradhan-i state anema jembiba aitsüogo.

BJP lenir yagi tatok meshiba sülen iba olen ya house records nungi agina liasü.

Tamil Nadu rongsenketzüng nung renloka aoba indang jembiba mapang Stalin-i, "Tamil Nadu ya linük nung rongsenketzüng nung tajungtiba renloka aoba state rongnung tanabuba lir. Taoba küm asem tsüngda private investments 10 lakh crore dak tema süogo. Tetsükdaksü kecha makara Tamil Nadu tajungba renloker lila," ta ashi.

Chief minister-isa, centre-i state nongshitsü merangba aser NEP ajanga state nung education system raksatsütsü ana nung aliba süoki ia bilemba lemsatepa laisü. "National Education Policy tenüng nung


parnoki Tamil Nadu nung education ajunga raksatsütsü atema policy benoker," ta Stalin-i Chennai anasa welfare assistance lemtsüba sentong ka nung ashi.

Stalin-isa, state-i oshi asem (Hindi aser Sanskrit densema) policy benoktsü mulunga agizük nungdang Centre-i education fund crore 2000 Tamil Nadu nem agütsütsü. "Onoki National Education Policy magizüksü. Nenoki crore 2000 dang masü crore 100,000 agütsü yonga onoki iba lendong aketba NEP scheme ya magizüksü," ta pai ashi.

CM-i ashiba agi, NEP yagi education privatize sütsütsü aser kaketshirtem nem maongka magütsütsü.

DMK lenir yagisa Pradhan-i jembiba o aitsüogo. "Yashi Dharmendra Pradhan-i pa temeli mazüoki Tamil nungertem uncivilized ta ashi. Saka pa o ya ghonda tesadang ka lir Tamil Nadu MP temi meyipa agütsüogo aser iba ajanga pa o meyipa agidaksü," ta Stalin-i ashi.

UP nung BJP lenir Gulfam tepset



BJP lenir Gulfam Singh Yadav den asüpila sentong nung nüburtemi shilem agiba noksa nung angur. Pa mim agütsüba sülen asü.

New Delhi, Metsüremi/ March 11 (Agencies): Uttar Pradesh kübok Sambhal district nung Hombarnü mejangjaba nisung aseme mim tuloktsüba sülen Bharatiya Janata Party lenir Gulfam Singh Yadav süogo.

BJP lenir shiba taoba mapang party indang western Uttar Pradesh unit regional vice president liasü, pa mozüki dangi anir aoba mapang asü.

Gunnaur indang Circle Officer Deepak Tiwari-i ashiba agi, Gulfam Singh Yadav ya Junawai police station kübok Daftara yimtsüng nung par alu nung mena aliba mapang nisung asem bike ka nung aru aser pa dak mozü ka tulokja liasü, ta PTI-i metetdaksü.

Hombarnü nikongtsütsü Gulfam Singh Yadav par kima mena aliba mapang nisung asem bike nung mener pa den ajurtepi aru ta police-i ashi. Parnok salempetba sülen parnoki Yadav koma ali aji ashishia liasü. Parnoki tajemtsü tzü meshia ajem aser iba sülen Yadav longdak ali.

Iba sülen parnok rongnung kati Yadav tepok nung mim tuloktsü aser jena ao, ta Live Hindustan sangdong ka ajanga metetdaksü. Iba sülen Yadav temang mejungi aküm aser tashi agi arüa liasü aser iba ajang par kinungertem aser temeket nung alirtemi pa timtemba jangja aküm. Yadav'er jabasoi police nem osang agütsü aser local health centre kati anir ao aser idakji pa Aligarh Medical College-i anir aotsü tuyuba agüja liasü. Ajisüaka Yadav lentom nung süatok.

Circle Officer Deepak Tiwari-i ashiba agi, Yadav'er kinungertemi tashishiba agütsüogo. Paisa, ken o bushisüngdangtsü atema police team ka yokogo, ta ashi.

Forensic team kati injection tazüng ka aser helmet ka densema kulitem bendenogo. BJP lenir indang tsüngsem aser glasses-a forensic investigation atema yokogo aser aibelena lirtem jangjatsü atema CCTV camera footage asadangogo, ta SP Krishna Kumar Bishnoi-i ashi.



TIR YIMYIM YIMOBILEM (EDITORIAL)

DIMAPUR WEDNESDAY, MARCH (METSÜREMI) 12, 2025

Lokti tentet mali nungbo !

Nagaland nung lokti tentet talira tentetba timtem aser meinprong indang yashi-yakanü tembangba Nagaland tatar senden nung kanga sashia jembiba angashiogo . Atangji, iba ken o ji tejembila jembir, kechiyong Nagaland nung yimtsüng aser kin kindong shia pei pei teburtem, tstsürtem, kaketshirtem aser lanurtem tentet zünger mezüngma tenteta lir. Iba denji ano Home department aser Co-Operative department ajanga tentetba society-bo meyririjang aika alitsü. Atangji, lokti tentetsa süaka tentetyim aser nükjidong balala lir. Aji oda, kaketshirtem telongjem, tzükong telongjem aser kin telongjem tentetbatem yabo pei lima aser nübortem telongjem ka nung pei temeten aser teinyaktsü meteta pei lima aser nübortem tejakleni anitsü nükjidong nung tentetbatem lir. Item teloktem yagibo government-i mapa shitak meinyakbatem pua anidaker aser takangba balala agüja mapa shitak inyakdaksür, anungji ashiko government nung alirtemibo item teloktem ya maginütsüa akok. Ano, telok tentet tapu kaji Home department-i Society's Registration Act ajanga tentetdaksüba society-tem asütsü. Item telok tentettem yabo tanga mulungtet teloktem ama masü saka pei ajangzüksü asoshi tentetba teloka masü saka tangar nüngdakba purtem ajangzükdaksütsü asoshi peisasa senotsü bushia inyaktsürtem lir, anungji item teloktem yabo temeim mapa inyakertem lir. Ajisüaka, ano Co-operative society yabo pei telok asoshi tajangzük bushitsü tentetba telok lir, anungji iba ama telok tentet yagibo pei lima nung rongsen renlok daksür. Aji oda, item telok tapu asem rongnung Co-operative Society ya asenoki junga tenzüka shitakba tajangzük aliba mapatem inyaka ao nungbo lanurtem asoshia mapa aika agütsütettsü aser Nagaland nungi tangaleni yoktetsüsa tachitsü, tajemtsü aser tagitsü tapu aika züsentettsü aser yanglutettsü. Item lokti tentettem tentetba nükjidong aser inyakyimtem indang kodang bilemdangdir, lokti tentet aika tentetbajisa tajungba ta asütsüsa angatetdir. Ajisüaka, kechiba tatartemi balaka Nagaland nung lokti tentet aika mesü daksüner ta asübaji bilemdangra, ashiko, lokti tentettemi government inyakyim nung onsara tebang aitba agi maginer asütsüa akok. Ashi, register süa yur mapa kecha meinyakyonga society aika register asüba agi government akoksadakbo mali, kechiyong society-temji mapa shitak inyaka maoyonga register asü dang registration aser renewal fee agütsüba agi government senpongi sen terabo aier aser society nembo government-i angati bensaa agütsütsübo kecha madoker. Anungji, government nung alirtemi Nagaland nung lokti aika tenteta aliba agi meinpronga bilemra, item lokti tentettemji mulungtet telok shirnoki government-i meshitak inyak dang mesüra teinyaktsüka meinyaktsü dang longkak aita akanger aser government timtemdaksür, item lokti tentettem indang ashir asüsü. Ajisüaka, tang ama mapang nung ya Nagaland nung lokti tentet kata mali nunga koma süla (?) ta kanga shisabolua bilemer. Aji oda., lokti tentet kati ola madokra kaketrejutemi tesayurtem shitak meyoker, mozü ki atema nüngdak kecha magütsür aser anepalur doctor meyoker, gari lenmang shitak meyanglur aser mapa tenzüka meinyaker. Aji oda, Nagaland nung government-i meshitak inyak dang ola adoktsüsa Nagaland nung mulungtet kata mali aküm nungbo, Nagaland government mapa nung inyakterema shinga office-i mao government-i agütsütetba anogo tashi ita sen chia pei kidang pei mapa inyaka amongtsü. Tang tatar senden amenba sülena Nagaland tia repringdangra, külen telok kari Khelhoshe Polythenic Atoizo tangsa Engieering college kümjang ta akanger, kari college-tem nung principal yokang ta akanger, kari mozü kidangi doctor yokang ta akanger aser ano karibo gari lenmang junga yanglujang ta akanger ta nübortemi aginüa bilemba talila nüngdak ka akanger masü saka makangyonga aser mashiyonga inyaktsür alitsüba mapatem meinyaktsüba agi lokti tentettemi ola adoktsüsa akümer. Iba ama ola adokyonga meinyaktsür nung, olajang ka adoker mali nungbo, Nagaland yabo government masü faction purtem lima kümadoktsü ana nung lir.

OLEMSABANG

NAGALIMAJI KHRISTAN LIMA TA MAPA AGI KULI SAYUTSÜLA

~ L. Kika Pongener.

(Yashi adok nungi...)

Ano kanga tesüngmangtsü kaji....Jila tulutem nung sungküm tongli-i Gate nung Gari ajak soiter telok-telok temelen saru (Tax) sarurtem arua alitsü akok...!!!??? Ano yimti-yimdong kinuk-kisang ajak nung yi taluposa ajemba aser ayokba angudang, talisa, Hotel & Restaurant-tem nung yi amshiba/ajemba angudang kanga sungmanga alitsü südi....!!!??? Khristan lima ka nung lenmangtemji repranga aonung, lenmang ajunga ayong den kecha tepila mali angudang kanga sungmanga alitsü südi...!!!??? Lenmang yanglutsü atema Center nungi sen Sanction-bo lakh/crore aika angur, saka Khristan lima nung ketdangsertemi Khristan ka ama ochishia ketdang masür, Khristan Contractor/Dekhadar-temi mapa junga meinyakba agi lenmangji majunger.... Tesungmangtsüka asen lima nung lenmang yangluba reprangra, Blacktopping mapa inyaka renemer ita pongu-terok tsüngda nungpo raksaa aor...Ano kanga tesungmangtsü kaji....mapa merenemdang mezüng tetenzüklen inyakba to-bo raksa-a anidakba angudang kanga-sa sungmanger....!!!???

Ano bendangertemji Jila aser yimtsüngtem sema aodang yimti-yimdong ajunga teshinem menema kanga-sa memeruk....Kima-yimdong ajak nung jana-ona mashi-mashi endoka aliba ngua kanga sungmanga alitsü südi...!!!??? Kechiyong asen Naga nunger aika dak libaliro nung awashi yimya (Civic Sense) mali. Jila ajunga nung tongtipang lenmang (Main road) ajak nung Gari mashi-mashi merepdanga anena ayuba (Wrong-side Parking) ngua kanga sungmanga alitsü südi...!!!??? Jila ajunga nung tongtipang lenmangtem nung 'Traffic Rules' kecha hesap mali pei sunutsü sua küshi-küshi anishiba angudang kanga sungmanga alitsü südi...!!!??? Osang kakat-tem (Media) nung sen meshitsü atema nisung amokmerenba, nisung poa bener aoba, rakzükraktemba, tetsür tashiyim agi raksatsüba etc.....Iba amala osangtem angudang kanga sungmanga alitsü...!!!??? Ano kodang Hornbill benjong mongdir....Mapokjang agi asaba yi (Local Rice Beer) taluposa jemteper, Rum, Whisky, Beer taluposa angur....Ano kodang amman arudir nuktapangdar aser japojarir onsara asükshijang merongtsüka....Oda khristan limabo khenyongi memesuki kanga-sa tala-pulateper ta jembiba angazük. Ashiko, angazükba amaji shitak inyaka benshia lira....Item mapatem ajakji ngua Khristan lima ka khenyongi memesuki angudang bendangertemji kanga aoksaa sungmanga alitsü südi...!!!???

Aji oda, Khristan lima ta ajatsübaji o agi masü, tema tereprangtsü yimyatem agi masü, saka mapa agi kuli sua sayutsüla. Revival alidak tesem nung dang masü, Revival alidang dang masü, Jubilee-mong amongdang dang masü aser tenla-kidang tekülem sentep aliba mapang nung dang masü, saka mapang ajak nung, tesem ajak nung Khristan lima ka ama mapa agi kuli sua sayutsüla. Sorkar nungi tenzüker yimden, arogo, mungdang aser loktiliba ajak nung ochimashi mapa (Corruption) malitsüla....Khristan lima ka ama mapa agi kuli sua sayutettsüla. Iba ama lima ka dangji dang Khristanlima ta ajatsü tapet asütsü aser asen lima reprangi/semdangi arur bendangertem-ia kanga nukshia repringtsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

MPnungyimsü melener nem tasüba temerenshi agütsütsü sentong yanglur

Bhopal, Metsüremi/March 11 (Agencies): India nung state ka indang chief minister-i tamangba yimsü melenba mapa inyaker nem tasüba temerenshi agütsütsü ozüng ka yanglutsü sentong lir ta ashiba ajanga central India nung Khristanpur aser arogo tenzüker tebilemtsü akar.

Madhya Pradesh chief minister Mohan Yadav-i March 8 nü state yimtiba Bhopal nung lokti senden ka nung jembidang, tashiyim amshia mesüra tiazü kuli amshia tamangba yimsü melendaktsüba mapa inyaker nem tasüba temerenshi agütsütsü asoshi state indang anti-conversion ozüng melenshitsü sentong lir, ta ashi.

Tanurtem dak tashiyim amshia shi nung medemba atema tasüba temerenshi agütsütsü state ozüng lir, ta pai ashi. Iba mesük tiazü mapa inyaka tamangba yimsü melendaktsür nem state-i tasüba temerenshi agütsütsü.

"Tamangba yimsü melenba tatok magütsütsü," ta Yadav-i ashidang teloki ola tulu agüja pela agizük. Madhya Pradesh ya linük nung Khristanpur anema mapa tamajung inyakba tesep ka ama züngshir.

Hindu yimsü nung metaloka aliba sorkari maneni yimsü asüba state nung Yadav-i iba osang sangdongba ajanga Khristanpur takum lendongi tali yoker, ta Khristan lenirtemi ashir.

"Ibai mi nung totzü shioktsüba amai lir," ta Bhopal nung aliba Sarva Isai Mahasabha (All Christian Federation) tir Jerry Paul-i ashi. Ruling Bharatiya Janata Party (BJP) bhukumba Hindu activists temi tamangba yimsü melendaktsür ta tai tonglokja asen nübur aser asen reju dak tenük yoker, ta pai ashi.

Yadav-i tamangba yimsü melenba atema tasüba temerenshi agütsütsü jembiba yagi Hindu yimsü akhanga amshir tem temulung ulushia asenok dak amaktsü... tang asenok takum atema tebilemtsü tuluba akumer, ta Paul-i March 10 nü UCA News dang ashi.

Mesüzüka, tashiyim amshia mesüra yimya balala amshia tamangba yimsü melendaktsüba aitsüba anti-conversion laws aliba Indian states 11 rongnung Madhya Pradesh ya ka lir.

Iba state nung küm 50 dak tema amshiba anti-conversion law ya 2021 küm melenshia aibelener nem küm 10 tashi tepuokdak ayutsü densema temerenshi tesashiba inoksem.

Iba ozüng ya talisa Khristanpur aser Muslim nung dak amshir, kechiaser iba indang ozüngtem ya Hindu nung dak mamshir, shirnoki tashiyim amshia Muslim nung aser Khristanpur yimsü melendaktsür, ta pai ashi.

"Chief minister-i sangdongba ya tamangba yimsü ajunga atema asünungbo

pela agizüktsü," ta pai ashi. Ajisüaka Khristanpuri tasüba temerenshi magizüker, kechiaser nisung ajak Tsüngrem nungi sempet ka ama züngshir. Anungji onoki iba ozüng bhukuma menokdaktsü, ta ashi.

Timtem ajurur aliba kin tilatem rongnung tesempatep adokdaktsütsü nükjidong nung Yadav-i iba osang ya sangdong, ta Muslim nunger putir Maulana Umar Quasim-ia ashi.

Anti-conversion law yanglushia tasüba temerenshi inoker agizüktsüsa state assembly nung BJP-i aniba sorkar nübu peria lir.

Saka iba mera yagi minorities, talisa Muslim aser Khristan pur renshikangshiba tali kumdaktsütsü, ta Quasim-i UCA News dang March 10 nü ashi.

Indian constitution ajanga senso ajunga nem pei jangraba tamangba yimsü shima amshitsü aser prokshitsü temeden agüja lir, ta Bhopal nung aliba Catholic lenir Daniel John-i ashi.

Khristanpur atema tashiyim amshia tamangba yimsü melendaktsüba mali, kechiaser temulung meyipba ya temulungjang nung lir...tashiyim amshia tamangba yimsü melenba otsü ya Hindu yimsü akhanga amshir temi minorities dak tenük yoker adokba lir, ta pai UCA News dang Hombarnü ashi.

ANOGO ABEN TSÜNGREM DEN

Temenen Menaba Jenjang Tulu

O Tsüngrem, ne temeim yimlibilem yari kü dang aochiang : Ne temeim taochi jenti yari kü dak ozüng raksaba tai endokjang (T. Ken 51:1)

Alima ajunga nung jenjang ataktsü makokba (priceless) ji meimchir tanela. Aseni iba jenjangji Kalvary nung angur. Kechiaser alima nung jenjang tasakbaji - asen menen - iba nungi alangzüktsü asoshi Yisu zü akanger.

Ano temenen taa anguba aseni angur. Dawidi temenen memenadang pa Tsüngrem tembar liasü. Pa nükjidong tongteta liasü. Pai temenen menar külen pa anemer ka aküm, alizüngji metongtet. Tenüngsang ken 32 aser 51 nung Dawid takürn melenshiba aser pai nükta pangta aser nisung tepsetba temenen nangzük.

Dawidi nükta pangta benshiba, nisung tepsetba aser iba temenen nembangtsü merangba otsü ajaki meteta lir. Iba taaji tesashi liasü. Asenoki shidakba temenenji kechi aser taa)i kechi metetnungbo, aseni Tsüngrcm anema temenen memenatsü. Saka aseni temenenji ret-ret a magir. Temenenji pa inyakyim ka lir. Dawidi o balala asem amshi. Aibelena aoba . Tsüngrem anema inyakba. Tai temenen (iniquity) temenen pur mulungsentsü tekirak indang ashir. Temenen ajanga alizüng metongtetba. Ano Dawidi temenen meshitettsüba ojang asem amshi. Mezüsaa (blot) aliba süsümedema kümdakjang. Iba tetezü sentsü aoba shidokjang. Tetezü temeneni menenja aliba shidokba. Meshidokba tetezü temenen nisung kaji chitemra aketba ama lir. aji anentsüba. Nai tatidangba nem mekokdaktsüdang tama, Dawid taküm nung temeneni kechi inyak aji bilemtetang. Temenen jenjangji tulu ta shisatetang, süra nai tatidangba nem mekokdaktsütsü.

Arogo lenirtemi Syria azüdokshi atema sarasademtsü ayongzüker

Damascus, Metsüremi/ March 11 (Agencies): Syria nung security forces aser tang Islamist yimsüsür tasenba den sendaktepa aliba nisungtemi civilian tem timba sür Alawites nung nisung aika tepsetba aser yirutsüba atema Syria nung Khristan lenirtemi aitsü.

Aid to the Church in Need ajanga Syria asoshi sarasademtsütsü ayongzüka liasü.

"Anogo ishika tsüngta Syria nung azüdokshi, tashiyim amshiba aser nisung tepsetba tali akumba angur, koba ajanga tetsür aser tanurtem densema civilian tem dak amaker," ta Syria nung Khristanpur lenirtemi lungjemer sangdong ka agüja liasü. Iba linük nung March 6, 2025 nungi tensa tamajungba akumer.

Archbishop Youssef Absi, Melkite Greek Catholic patriarch of Antioch and All the East den John X, Greek Orthodox patriarch of Antioch and All the East aser Syriac patriarch of Antioch and All the East aser supreme head of the

Universal Syriac Orthodox Church, Mor Ignatius Aphrem II nung temi sangdong ya March 8 nü agüja liasü.

Syria northwest tsütsü tsükumlen Alawite nung alidak Tartus, Baniyas, Jabla aser Latakia tesemtem nung nisung jenti tepsetba athishia arogo lenirtemi ashi, kong rongrongshirong tesashi adoka aliba indang war monitor Syrian Observatory for Human Rights ajanga sangdonga lir.

Iba tesem ya Syria indang taoba Assad yimli tamendak dak liasü, shibai küm 53 yimsü sür taoba küm tatemlen Tir Bashar Assad ya atsüngdoka liasü. Observer temi ibai Syria nung civilian tem tsüngta küm 14 mepetmesü adoka aruba nung tamajungtiba lir ta ashir.

Bashar Assad ya minority Alawite lir, shibai Sunni Muslim majority dang nungi par kin ya balaka repranga liasü.

Assad indang Alawite sect sülen anidaker temi mapa tamajung inyaker, ta interim president Ahmed al-Sharaa-i aniba Syria sorkar tasenbai

ashir.

"Yimjung amokmerenba inyakyim ajunga Khristanpuri aitsür, aser tai maket civilian dak tenük yoker nisung jenti tepsetba aitsür, item tetsübotsü mapa tangsa anentsü akhanger," ta arogo lenirtemi ashi.

Parnoki Syrian nüburtem tatok agütsütepa jungshiteptsü asoshi tekeraba nung tens aka bener arutsü ajungshia liasü.

Political system tasenba nung Syrian senso ajunga dendaktsütsü asoshi parnoki December ita ayongzükb a tanaben nenshia liasü.

"Iba ama timtem aser tejashi mapang, asenoki yimjung asoshi chichiba tera ka dangi meyiper: sarasadem. Tamanger ajunga dang Tsüngrem dang sarasademtsü, Pa temeim aser tashi nung tamang akatsü ayongzüker," ta Aid to the Church in Need International tir Regina Lynch-i ashi.

Tartus, Baniyas, Jabla, Latakia aser temeket yimtsüngtem asoshi March 7 ya kangasa temulung shirangtsü

anogo ka liasü, ta Latakia nung alir osang ajanga ACN dang ashi.

Alawite militants temi mita atar security forces tasenba nungi züngsem 20 shi tepsetba langzüa Alawites nung aika tepseter, ta ashi.

Nisung 600 dak tema, timba civilian, takum sama aser yangji lanurtem, tetsür, university doctors aser pharmacists tem lir. Kibong karbo tanurtem densema taochi makai tepset, ta kasa osang ajanga ashi.

Asürtem rongnung Khristanpur densema lir, tatishitsü agi Latakia nung evangelical arogo ka nungi tebu aser jabaso, shirnok gari nung lia anendaktsür tepset aser ano Baniyas nunga putir ka tebu tepset, ta ACN sangdong ajanga ashi.

Khristanpur densema kidang nungi osettsüset aser gari tem auyaba osang lir, anungji kibong aika Sunni nung tembar kidang jenok. Khristanpur aliba Belma yimtsüng nung nok-nü meliasü

aser yangji alir timba teintet rogotem, kong anogo ana timtem agütsür ki o jen raksaja rongsen jenti ayua.

Iba mapang Khristanpur, Kurds aser dangar kar tepset, saka parnok ya tamangba yimsü mesür kin dak ajemdaker tenük yokba masü, ta tensa junga meteta alir kari ashi.

"Yangji alirtemi ibai tamangba yimsü tsütsü masü saka yimten tsütsü inyaksangshir ta shiogo," ta tawa Syria semdangla aser Washington nung amenoka aliba International Religious Freedom Secretariat tir Nadine Maenza-i ashi.

Aleppo nung aliba St. Francis of Assisi Church indang putir Franciscan Father Bahjat Karakach ajanga iba tensa indang sangdong ka agütsüba nung, Syria nung ano civil war ajurutsü akok, ta ashi.

Syrian society nung alir ajak Al-Sharaa sorkar nung mali, koba Syria tashi ita aser yimjung nung alitsü atema kanga tongtipang lir, ta Father Karakach-i ashi.

AO OSHI ANGAZÜKDAK:**TANÜ ANGAZÜKTSÜBA OJANG****Telakzü**

(v) meinperong tesü, tasaten ta ashiba (don't irritate , keep quiet)

* Tesayuri tanurtem dang telakzü ta ashi.

Telala

(adj) tashi mait (bendable (bamboo type material), supple)

* Onoki süng telala ka amshia angö mesü.



Tir Yimyim

OLONG PAITEP # 7088

	1				2			3		4
5								6		
7			8							
								9		
		10								
11										12
					13					
					14					
15										

TIPLIN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

- (5)

- (4)

- (6)

- (4)

- (7)

- (4)

- (6)

- (4)

- (5)

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

- (4)

- (6)

- (5)

- (4)

- (5)

- (5)

- (6)

- (5)

- (4)

- (4)

OLONG PAITEP # 7087 TELANGZÜBA**TIPLIN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER MA

Barrington Scott-i anogo 19, ghonda 19 aser minute 40 nung continents 7 prong nung scuba diving asüba atema alima otsü tasen ka yangluogo.

November 13, 2024 nü Australia nungi tenzükba

December 3 nü Antarctica nung tembang.

Iba mapang Scott-i kilometer 43,000 tashi sema senzü aser idangji pai Thailand, Egypt, Malta, United States, aser Argentina linüktem nung scuba diving asü aser Guinness World Records (GWR)-i kulikaket agütsüogo.

Arunachal Pradesh nungi 3,900-km bike rally tenzükogo

Dibrugarh, March 11, 2025

(Agencies): Hombarnü Arunachal Pradesh kübok Vijayanagar nungi 3,900-km bike rally "Shaurya Yatra" tenzükogo.

Kilometer 3,900 talang journey ya Arunachal Pradesh

nungi Gujarat nung Rann of Kutch tashi senzütsü aser iba ajanga "Ek Bharat, Shreshtha Bharat" (One India, Great India) tangatetba ajungkettsü.

Iba rally flag-off ceremony nungarishi küm 90 tain Rifelman Padam Singh Rawat (retired)

tambusang ser ex-servicemen aser Veer Naris aden.

"Ek Bharat, Shreshtha Bharat," ajanga Assam Rifles, Indian Army aser Arunachal Pradesh nungi civilian riders 4 dena lir.

BJP-i Manipur nung President's Rule benokba pusemer

Imphal, March 11, 2025

(Agencies): Bharatiya Janata Party (BJP)-i Manipur nung President's Rule benokba ya yimtenren tangatetba nung masü saka constitutional requirements ajanga lir ta metetdaksüogo.

Manipur atema budget lezmükba indang parliamentary debate nung BJP lennir Biplab Deb-i iba ya ashi.

Mapang tatakzük nung assembly session ayonga magitetba agi iba lemtet agi ta pai ashi.

Deb ya taoba Tripura chief minister lir aser pai linük temzüng kübok iba lemtet ya agütsü nüngdak kümadak ta ashi.


Tesüiba küm 10 tsüngda Centre-i Manipur aser Northeast ajungalen infrastructure nung temlung agüja inyaker. Küm aika railway aser road connectivity senzüka yutsü ta Deb-i ashi.

Armed Forces (Special Powers) Act (AFSPA) kübok tesemtem ajema aküm. Northeast kübok tesem 75%

nungi AFSPA agienogo ta paisa ashi.

Modi'er sorkari free health insurance aser medical education nung regional languages amshitsü tenzükogo, ta Deb-isa metetdaksü.

"Modi'er sorkari Lok Sabha aser state assembly tem nung tetsür nem 33% lezmüksütsü atema ozüing ka yangluogo. Taoba UPA sorkar mapang Sonia Gandhi lenisüba kübok women's reservation bill magizükteti süidaksü" ta paisa ashi.

Assam-i Rs 350 crore satellite network tenzüktsü: CM Sarma

Guwahati, March 11, 2025

(Agencies): Assam nung satellites 4-5 tashi senzütsü aser iba ajanga real-time data agütsütsü ta Assam Chief Minister Himanta Biswa Sarma-i ashi.

Assembly nung Assam Budget 2025 atema olemtepdang satellite ka nung Rs 60-70 crore shi endoktsü aser real-time flood & disaster monitoring, ozüing alema aruba aser drug shibelenba atema

surveillance, national parks nung wildlife tracking aser agriculture & road networks tajungba akümstsü atema yariteptsü ta CM Sarma-i ashi.

Assam sorkari IN-SPACE (Indian National Space Promotion and Authorization Center) den satellite constellation project atema olemtepdar ta pai ashi.

Assam Budget 2024 ajanga state rongsenketzüng renloktsü aser technology tsütsü tejakleni

aotsü enoka lir ta CM Sarma-isa ashi.

Assam technologic tsütsü tashi aitsü atema Indian Space Research Organization (ISRO) den yaritepa Assam-specific satellite tenzüktsü. Assam nung tzümetsüing agi kanga timtemer aser iba satellite ajanga tzümetsüing asadangtsü, arrtsü mita repringtsü aser agricultural sector yaritsü ta CM Sarma-isa metetdaksü.

SANGTAMTILLA AO BAPTIST AROGO

RANGAPAHAR CROSSING, DIMAPUR - 797112 : NAGALAND

TENÜNGSANG AGÜTSÜR

Sangtamtila Ao Baptist Arogo nungi adokba laishir **Dr.Alemchuba Aier**, S/o. Wb. I. Meren Aier (Mopungchuket) aser Wt.Atenla Ozükum (Yimjenkimong), Doctor of Ministry, India Baptist Theological Seminary Areeperambu, P.O. Kottayam, Kerala, nungi takok tajung ngutetba asoshi Arogoi konang tetushi aser tenüngsang tulu agütsür aser tematiba Tsüngrem tenüng asanger. Dr. Alemchuba Aier-i züluba thesis **"Corruption, Partiality And Erosion Of Christian Leadership Values : A Study of Political Governance In Nagaland And Its Implications For Christian Churches"**. Tsüngremer yimli asoshi ne sempet aser wadang tali moajangma ta Sangtamtila Ao Baptist Arogoi tarutsü anogotem asoshi maneni sarasademtsür.

Sdl-
S. Ayu Imsong
Clerk, SABA

Sdl-
Nungshimeren
Pastor, SABA

Security tsütsü timtem tulutibaji Russia lir: Sweden

Stockholm, Metsüremi/ March 11 (Agencies): West tsütsü tashiyim yimya amshiba mechi Sweden asoshi timtem tulutibaji Russia ya lir ta Scandinavian linük indang security service Sapo ajanga ashi. NATO nung Sweden adenba ajanga par security tashi itshiogo, aser iba yongji Russia nunger itdangiter inyaksangshia tali kumogo, ta parnoki annual report nung ashi. Russia-i aibelen mapa kecha meinyak ta ashir. Sweden nung security tensa ya tebilemtsü tulu lir, kong bendang linüktem amokmeren yimya nung hybrid warfare dener inyaksangshir, ta Sapo ajanga ashi. Security tensa tamajungba akumtsü aser metakzütettsü, ta Sapo tekolak Charlotte von Essen-i ashi. Sweden ya taoba küm NATO züngsem akum, aser ibaji 2022 küm February ita nungi tashi ajak amshia Ukraine amakba tenzükbä sülen Russia den tokteptsü asoshi teimla tulutiba ama repranger. 2022 küm January ita par civil defence minister-i tarutsü nung Russia-i tashiyim amshiba mechi Sweden nung rara alitsü

akok ta tekum dangtsü ashi. Russia nunger itdangiter inyakyim ya talisa NATO züngsem tsüngta tesendaktep nung timtem agütsütsü, West-i Ukraine yariba anema aser tenokdangba paidoktsü asoshi inyaker, ta Sapo-i Mongulbarnü ashi. Item inyakyim yagi Sweden aser Europe defence asoshi Russia ya lendong tali lir aser rara menaner amai akumba sayur, ta ashi. It dangiter osang bendendang Russian security aser intelligence services-i resources aser sapang balala amshir ta ashi. Sweden ya saksalema alitsü nüngdaker aser tensa tasenba asenoki yimya ka ama mezüngshitsüla, ta von Essen-i ashi. Russia-i Ukraine amakba sülen tzüyim telung nung cables aser gas pipelines aika raksa aser iba yongji NATO-i züiyim nung monitoring mission yok. Tesüsa iba ama atalokba ya Sweden indang asetkong tulutiba, Gotland anasa taoba ita liasü. Russia-i iba ama mapa meinyak mesüra linük balala indang democratic system nung teka amoshitsü tejangraba mali ta ashir.

Ukraine-i drone aika amshia Moscow amak

Kyiv, Metsüremi/March 11 (Agencies): Ukraine-i drone aika amshia Moscow amakba mapang nisung ana tepset aser teraksatsüba tulu bener aruja liasü. Mongolbar anepdang Russia yimtiba amakba koba Kyiv-i ashiba agi drone timtiba agi Moscow amakba liasü, iba ya Saudi Arabia nung United States nunger ketdangsürtem den Russia den partial ceasefire atema sentong ka benoktsü atema Ukraine renemba mapang atalokogo. Moscow region governor Andrei Vorobyov-i ashiba agi, Ukraine nunger drone temi linük yimtiba ya anepdang 4 ako nungi tenzüka amak, aser iba mapang nisung aika yiruba den nisung ana asü. Drone tem aika yoka amakba sülen nisung aliba ki aika raksaba den linük yimtiba nung airport tem shibanga liasü. Ukraine nunger national security council ketdangsür Andriy Kovalenko-i osang tai sangdongba indang jangshija ashiba agi, drone agi amakba ajanga Kyiv-i Saudi Arabia nung sentong ka benoktsü renema aliba ya agizüktsü atema Russia tir Vladimir Putin ajungmestsüla. "Puti otsü nung drone timtiba amshia Moscow aser iba yimti temeket makogo," ta Kovalenko-i ashi. "Iba ya Putin dang ceasefire atema pa-a jangra akümtsü atema temaitsü talila ka agütsüba lir." Russia indang Ministry of Defence-i ashiba agi, parnok indang air defence temi manger mesangwa tsüngda Ukraine nunger indang drone 337 raksatsüogo aser item rongnung

91 bo Moscow region nung raksaja liasü. Moscow indang Mayor Sergei Sobyanin-i tsükchirtem indang drone temi Moscow amakba indang metetdaksü, koba Russia indang air defence temi khdanga liasü, ta ashi. Sobyanin-i ashiba agi, drone tem ya Moscow region kübok Ramenskoye aser Domodedovo district nung khadanga liasü. District anaprongla ya Kremlin nungi south aser southeast len km 40 aser km 50 pilar lir. Russia indang aviation authority Rosaviatsia-i ashiba agi, drone temi yimti amakba sülen Moscow kübok airport pezü nung tayimtsü senzüsenpong nokdangogo. Airport tem rongnung yimti south len Domodedovo, Vnukovo aser Zhukovsky aser yimti north len Sheremetyevo densema lir. Russia den ceasefire atema sensak asemtsü atema Ukraine aser US nunger ketdangsürtem Saudi Arabia nung senden ka ametsü lia tang Kyiv-i Moscow makogo. US Secretary of State Marco Rubio aser tir Donald Trump indang national security adviser Mike Waltz na iba sensaksem nung adentsü. February 28 nü White House nung Ukraine tir Volodymyr Zelenskyy aser Trump na senden junga metembangtteba sülen tang mezüngbuba US nunger ketdangsür tejentem Ukraine nunger ketdangsürtem den senden amentsüba lir. US-i military teyari agütsüba atema tenüngsang peria magütsüba asoshi Trump-i White House nung Zelenskyy

aitsüba sülen Washington-i Ukraine nem intelligence aser satellite imagery agüja aliba dena teyari kecha magütsütsü telemtetba agiogo. Yimjung atema sensaksemtsü asoshi Kyiv nongshitsü nükjidong nung parnoki iba jenjang agiogo. White House nung tatalokba sülen Trump-i akhangba tenangzüktepba ka nung sign mesüi Zelenskyy oatok. Iba tenangzüktepba ajanga taoba mapang prangbong injang aser hadir balala agütsüba melena Ukraine indang mineral wealth aika amshitsü asoshi US nem temelaba agütsüla. Lenir ana ajurutepba sülen Ukraine tir-i Trump dangi tatok meshia shiti ka zülüogo. Pa Hombarnü nikongtsütsü Saudi yimsüsürtem den ajuruteptsü atema Jeddah yimtiogo, ajisüaka Mongolbarnü sensaksembo teyari agütsür asem nem bendanga toktsüogo. US-Ukraine sensaksem maka tsüngda Saudi Crown Prince Mohammed bin Salman den jelia ajurutepba mapang Zelenskyy-i teti atema yimjung benoktsü asoshi tenantzüktepba yanglutsü asoshi Ukraine takhangbatem sensaksemogo, kong tepuokertem chiochtsüba, Moscow-i pur ao ta Kyiv-i ashiba tanurtem chiochtsüba densema lir, ta Zelenskyy indang office sangdong ka ajanga Hombarnü metetdaksü. Lenir ana yagi military aser civilian tepuokertem chiochtsü aser tanurtem meyipa agütsütsü atema Saudi Arabia-i teyongtsüi ia inyaktsü atema takoktsü lenmangtem indang sensaksema liasü, ta kasa sangdong ajanga metetdaksü.

Taoba Philippine tir Rodrigo Duterte puogo

Manila, Metsüremi/March 11 (Agencies): International Criminal Court (ICC) ajanga agütsüba warrant ka nung taoba Philippine tir Rodrigo Duterte puogo. Pai temesepba mozü anema raradang nisung meimchir anema mapa tamajung inyak ta tai tongloktsüba ICC ajanga bushisingdang sütar. Duterte ya Mongulbarnü Hong Kong nungi Manila airport tonga aruba sülen pua bener ao, ta Philippine sorkari ashi, shirnoki ICC temepishiba ya international police agency, ka nung ashi. Ken o ya Duterte-i temesepa mozü anema inyakba dak sendakba lir, koba pa tir inyakdang 2016 nungi 2022 tsüngtainyaka liasü. Temulung melempi alirtem ozüng kübok inyakyim shidak meinyakdaksü aser tanurtem densema nisung meyerijang aika asü, ta ashishitepba ken o nung shia lir. Taoba tiri pa kechi kuli ajanga apu ta asüngdanga liasü. "Ozüng kechi aser kechi mapa tamajung ni inyak?" ta par jala Veronica Duterte-i social media nung prokshiba video ka nung Duterte-i ashi. "Ni memulungi ni yagi anir aruba atema ozüng tamendak dak kü dang tangsa rasaa shiang. Ibai nisung kar mapa lir," ta pai ashi. Honibarnü Hong Kong nung o jembidang, tir ka ama pai inyakba bhukuma pai Filipino nübur asoshi ajak inyakogo ta shia liasü. Duterte küm trok tir inyakdang anti-drug operation nung nisung 7,000 dak tema tepsetogo, ta police records kabu nung lir," ta sorkari sangdong

advocates temibo nisung 30,000 dak tema tepset ta ashir aser yangji mejangjaba nisung temi tepsetba dena lir, shirnok tesülen police officers tem liasü ta jangjatet. Human Rights Watch (HRW) ajanga Duterte apuba ya Philippines nung ochi inyakyim atema tongtipang mera ka lir ta ashi. "Pa apuba ajanga timtem ajurur alirtem aser parnok kinungertem ochi obendang anasai anir arutsü aser ozüng dang temaba shinga mali ta sangdong tejangja agütsütsü. Marcos sorkari tekeraba nung pa ICC nem agütsütsüla," ta HRW indang deputy Asia director Bryony Lau-i sangdong ka nung ashi. ICC ajanga iba ken o ya 2018 küm nungi asadang tenzü. Duterte ya Philippine tir inyakba mapang temesepba mozü anema rara sangdonga police temi drug suspects tem dak akhatsü mesüra tepsettsü ajungmeso. Iba rara nung town mayor ter dak tema aser tesem balala nung ketdangsür aser okatsür aser obendanger tem densema tepset.

ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110029
EXAMINATION SECTION

ADMISSION NOTICE NO. 48/2025

F.No.AIIMS/Exam.Sec./Advt./4-5/(INI-CET-PG-July-25)/202527.02.2025

INI-CET for admission to PG Courses for July 2025 session

AIIMS, New Delhi invites online applications for Institute of National Importance Combined Entrance Test (INI-CET) July 2025 Session for admission to PG courses [MD/MS/M.Ch.(6years)/ DM(6years)/MDS] of AIIMS, New Delhi and other AIIMS, JIPMER Puducherry, NIMHANS Bengaluru, PGIMER Chandigarh & SCTIMST Trivandrum as per following schedule:-

Date of uploading Prospectus Part-A including eligibility criteria: 10.03.2025	Start date	Closing Date
Online Registration for application	10.03.2025	15.04.2025 (by 5:00 pm)
• Registration and Basic Information	10.03.2025	15.04.2025 (by 5:00 pm)
• Generation of Examination Unique Code (EUC)	01.04.2025	25.04.2025 (05:00 pm)
• Completion of Application form		
Uploading of admit card on AIIMS website	10 th May, 2025 (Saturday)	
Date of Examination	17 th May, 2025 (Saturday)	

Please visit the website www.aiimse-ams.ac.in regularly for all the latest updates and detailed information.

PAAR

CBC 17112/11/0062/2425

ASSTT. CONTROLLER (EXAMS)

Alempang Ward Mokochung nung Futsal Turf ka lapok



Alempang Ward Mokochung nung Futsal Turf ka 164 Infantry Battalion (Teritorial Army) Naga CO Col. Gaurav Singh. SC,SM-i lapoktsüdüng tangokba noksa.

Mokokchung, Metsüremi/March 11 (TYO): Tanü Alempang Ward Mokochung nung Futsal Turf ka 164 Infantry Battalion (Teritorial Army) Naga CO Col. Gaurav Singh. SC, SM-i lapoktsüdüng.

Kechi mapa südir süaka nisungi sentong atonger saka ibai asangsang nungbo Tsüngremi ataloktsür, anungji tanü iba Futsal Turf ya nüburtem ajangzüksü asoshi Tsüngrem teyari ajanga inyaktetogo, ta 164 Infantry Battalion (Teritorial Army) Naga CO Col. Gaurav Singh. SC, SM-i iba Futsal Turf lapoktsüba sentong nung jembidang ashi.

Advisor Water resources Tongpang Ozükum-i mapang aben Angetyongpang nüburtem lenmang ka nungbosa yaridaktsüner, ta mapishiba iba Futsal Turf Alempang Ward

nung aser ano Chapka yim aser New Yaongyimti nung ta mapa ana inyakdar aser iba ya Indiang Army "Operation Sadbhavana" sentong kübok bener aruagi inyaktsür, ta Col. Gaurav Singh-isa ashi.

Col. Gaurav Singh-isa, Operation Sadbhavana yagi nüburtem lenmang balala nung yarir aser Angetyongpang constituency nung iba mapatong kübok mapa asem (3) tashi inyaker, tanü iba ground mesemtetba nung nüburtem tajangzük akatsü tamang teimla akar, ta metetdaksü.

Sentong nungsa Advisor Water Resources, Govt. of Nagaland Tongpang Ozükum-ia mapang tatsüka agia jembidang, Nagaland nung district shia nung Futsal Turf kakabosa alitsü saka Alempang nungbo alakteta akabaji 164 Infantry Battalion

(Teritorial Army) Naga CO Col. Gaurav Singh. SC, SM-i asen nübur meima agütsüba lir, ta Col. Gaurav Singh. SC, SM nem tenüngsang agüja ashi. Paisa iba Futsal Turf dak sentakba maparen alibajia tarutsü anogotem tajungtiba nung inyaktsü, ta lemsatapa liasü.

Kasa sentong nung ali kibur Lady Bird School, Alempang Ward Yimden Chairman Wb. Limasashi aser MMC Councillor Kr. Maongtula tenatia shilem agia jembiba den Sentong tenzüka Alempang Baptist Arogo Deacon Wb. T. Among-i sarasadem aser Wt. Imnasangla ketdangsüba nung iba sentong agi, aser iba Futsal Turf meshiteta Alempang Baptist Arogo Pastor Rev. Ngangnen Lkr ajanga sarasadema liasü.

Michael lenisüba nung New Zealand T20 team asayatsü



Metsüremi/March 11, 2025 (Agencies): Tawa tembangba ICC Champions Trophy nung kanga junga asayaba sülen Michael Bracewell lenisüba nung tang mezüngbuba New Zealand team kidang Pakistan den T20I pongu asayatsü lir.

"Linük captain mapa inyakatsü ya tetushi tulu aser maongka tajung lir. Taoba küm team anir Pakistan nung jangradem asayaogo, aser iba team nungi asayartem aika tang asayatsü aliba asayamung nunga densema lir," ta

Bracewell-i ashi.

Bracewell aser tanga asayar trok Hokolbarnü Christchurch nung training camp nung adentsü.

Arishi küm 34 tain all-rounder, shiba 2022 küm mezüng asayaba sülen linük tenüng nung asaya 66 nung asayaogo, pa lenisüba nung NZ team taoba küm Pakistan nung oa white-ball asayamung ka asaya liasü.

Paisa, team anir maneni asayatsü atema maongka anguba atema yongya ataba lemsatepba den Champions Trophy final mekoktetba atema sasaba lemsatapa liasü.

"Dubai nungi aruba asayartem tezüdanga alitsü, saka kasa mapang nung onoki New Zealand atema kechi ajangzüketogo, iba atema nema adanger. Talang nungi onok nongita yariba atema pelar aser kidangi meyipa arur fan tem matsüngda asayatsü yongya atar," ta paisa shisem.

IPL sayatsü aliba ajanga T20 squad nung asayartem aika

mali, kong Devon Conway, Lockie Ferguson, Glenn Phillips, Rachin Ravindra aser limited-overs skipper Santner nung densema lir.

Ish Sodhi team nung züngoksemogo aser Ben Sears-a hamstring yirur aliba taneptsü anguba sülen team nung denogo.

Matt Henry, shiba yiruba ajanga final masayateti liasü, pa asaya pezübuba aser pongububa nungbo asayatsü imlar. Kane Williamson-i Pakistan den asayamung nung shilem magitsü telemtetba agiogo.

Pakistan den asayamung atema New Zealand squad:

Michael Bracewell (c), Finn Allen, Mark Chapman, Jacob Duffy, Zak Foulkes (games 4 & 5), Mitch Hay, Matt Henry (games 4 & 5), Kyle Jamieson (games 1, 2 & 3), Daryl Mitchell, Jimmy Neesham, Will O'Rourke (games 1, 2 & 3), Tim Robinson, Ben Sears, Tim Seifert, Ish Sodhi.

Deepti all-rounders rankings nung top 5-i iogo

Metsüremi/March 11, 2025 (Agencies): India tsür Deepti Sharma tawa sayaba ICC Women's ODI all-rounders rankings nung New Zealand tsür Amelia Kerr jakdang pongububai tuogo.

Arishi küm 27 tain India tsür la yagi point 334 ngua pongububa tongtetogo. Kasa mapang nung Australia tsür Ashleigh Gardner maneni temaba jenjang nung lir.

Deepti ya T20 all-rounder rankings nung tasembuba aser ODI bowling rankings nung pezübuba nung lir.

Sri Lanka tsür Chamari Athapaththu-i tawa New Zealand den ODI asayaba

mapang kanga junga asayaba sülen la jenjang ana tejakdangi tuogo.

Athapaththu shibai iba asayamung (koba NZ-i 2-0 agi akok) nung run 25 yangluba den wicket asem agia liasü, lai Sophie Devine ajateta Australia tsür Annabel Sutherland den külemi jenjang tenetbuba nung lir.

ODI batting rankings nung India tsürtem rongnungi Smriti Mandhana kija top 10 nung lir. La South Africa tsür Laura Wolvaardt sülen tanabuba jenjang nung lir.

Maneni Nat Sciver-Brunt-i Athapaththu ajateta ODI batting rankings nung la tasembuba nung lir.

BNP Paribas: Alcaraz, Aryna, Gauff & Keys nungeri takok angu



Metsüremi/March 11, 2025 (Agencies): BNP Paribas Open tebur kija asaya nung Hombarnü defending champion Carlos Alcaraz-i 6-2, 6-4 agi Canada nunger asayar Denis Shapovalov kokogo.

World number three Spain nunger asayar ya iba asayamung nung highest ranked asayar kümogo, aser pa taruba round nung Grigor Dimitrov mesüra Gael Monfils den asayatsü.

Arishi küm 21 tain asayar ya Roger Federer aser Novak Djokovic na sülen iba asayamung asem ben atonga akokba asayar akümtsü merangdar.

Kasa asayamung tetsür kija asaya nung world number one Aryna Sabalenka-i Lucia Bronzetti 6-1, 6-2 agi koka round of 16 tongtetogo. Lai iba asaya ghonda ka ser minute 14 nung koka liasü.

Sabalenka taruba asaya British tsür Sonay Kartal den asayatsü, shibai Polina Kudermetova 7-5, 6-3 agi kokogo.

Tetsür kija asaya nungsa Australian Open champion

Madison Keys-i kanga meranga asayar 6-2, 6-7 (8/10), 6-4 agi Elise Mertens kokogo.

World number three Coco Gauff-ia 6-6 (7/1), 6-2 agi Greece tsür Maria Sakkari kokogo, shibai taoba küm semifinal nung Gauff tsükdakja liasü.

Moyuka Uchijima akokba asaya nung double faults 21 menaba sülen Gauff-i iba asaya tajungba asayatetogo.

Gauff taruba asaya Switzerland tsür Belinda Bencic den asayatsü. Bencic-i 6-4, 6-4 agi Russia tsür Diana Shnaider kokogo.

Teburtem rongnung World number four Taylor Fritz-ia Chile nunger asayar Alejandro Tabilo 4-6, 6-3, 6-1 agi kokogo.

Pa taruba asaya Britain nunger Jack Draper den asayatsü, shibai Jenson Brooksby 7-5, 6-4 kokogo.

Argentina nunger Francisco Cerundolo-i Botic van de Zandschulp 6-3, 6-4 agi kokogo. Cerundolo taruba asaya Australia nunger asayar Alex De Minaur den asayatsü, shibai Hubert Hurkacz 6-4, 6-0 agi ayong ayonga koka liasü.

BILEMDANGANG

"Anogoshiaji tenüngsang agüja tenzü kang."